

12.november

UKA09/96

**Nunalerinermik inuussutissarsiornerup siuarsarnejarnissaa pillugu
Inatsisartut inatsisissatut siunnersuut nr. Xx xx. 2009-imeersoq**
(Naalakkersuisunut ilaasortaq Ane Hansen, Inuit Ataqatigiit)

pillugu

Aalisarnermut ataatsimiititaliap

ISUMALIUTISSIISSUTAA

Siunnersuutip aappassaaneernejarnerani saqqummiunneqartoq

Inatsisartut Aalisarnermut, Piniarnermut Nunalerinermullu Ataatsimiititaliaat suliarinninnermini ukuninnga inuttaqarpoq:

Inatsisartunut ilaasortaq Hans Aronsen, Siulittaasoq, Inuit Ataqatigiit
Inatsisartunut ilaasortaq Andreas Uldum, Siulittaasup tullia, Demokraatit
Inatsisartunut ilaasortaq Anders Olsen, Inuit Ataqatigiit
Inatsisartunut ilaasortaq Hans Enoksen, Siumut
Inatsisartunut ilaasortaq Siverth K. Heilmann, Atassut

1. Siunnersuutip siullermeenera.

Siunnersuut partiit tamarmik akornanni ataatsimut isigalugu Inatsisartuni tapersorsorneqartoq Ataatsimiititaliap maluginiarpaa.

2. Siunnersuutip imarisaa.

Nunalerinerup imminut akilersinnaanera isiginiarlugu nunalerinermik inuussutissarsiummut tapiissuteqartarnermi sinaakkusiornissamut aalajangersaanissaq siunnersuummi pingaarnertut anguniarneqarpoq. Maannakkut

tapiissuteqartarnermik aaqqissuussinermi periaaserineqartup allanngortinnissaa siunnersuummi siunertarineqanngilaq. Taarsigassarseriaatsit amerlassusaasa killilernerisigut aningaasat pitsaernerpaamik atorniarneqarnerat siunnersuummi anguniarneqarpoq, taamaalilluni nunaateqarnermik inuussutissarsiuteqarnermut siunissami taarsigassarseriaatsit marlut atorineqassallutik. Tassaapput inuussutissarsiutip siuarsarneqarnissaa pillugu taarsigassarsisitsineq aamma ingerlatsinerneq aningaasartuutitut taarsigassarsisitsineq. Siunnersuut malillugu Naalackersuisut inuussutissarsiut siuarsarniarlugu taarsigassarsiat akilerneqarnissaannut tapiissuteqarsinnaapput, taamaalilluni taarsigassarsisup nammineq akilersuineranut sanilliullugu taarsigassarsiat sukkanerusumik nalikillilernerneqarsinnaallutik. Pineqartoq aningaasatigut iluanaaruteqarnissaa ilimasaarutigineqarmat taamatut iliuuseqarneq taarsigassarsisup taarsigassarsinermi isumaqatigiissummik naapertuinissaanut

kaammattuutaasussatut Naalackersuisunit naatsorsuutigineqarpoq. Peqqussummut atuuttumut sanilliullugu suusupaginnittoqarnerani Naalackersuisut iliuusissatut periuuserisinnaasaat assigiinnigut killilernerneqarput, tamatumammi kingunerisaanik peqqussummi atuuttumi akilersuinerluttunut pillaammik ernialiisarnerup kissaatigineqartutut sunniuteqanngitsoortartoq takuneqarsinnaammat. Aammattaaq pissutsit immikkut ittut pineqartillugit ukiut marlut tungaannut inuussutissarsiutit siuarsarniarlugit taarsigassarsianut akilersuutininik kinguartitsisinaannermik siunnersuut imaqarpoq. Pissutsini immikkut ittuni akiliinissamut piffissaliusaaq suli kinguartinneqarsinnaavoq. Inatsisissatut siunnersuut malillugu taarsigassarsinermi isumaqatigiissut suli eqqortinneqarsimannngippat periarfissaaq tassatuaavoq taarsigassarsianik atorunnaarsitsineq, qularnaveeqqutillu tuniniarnissaat siunertarlugu tigusineq. Aammattaaq aaqqissuussinermut atuuttumut sanilliullugu siunnersuummi siamasinnerusumik isiginninniartoqarlunilu anguniagaqartoqarpoq, inatsisissatut siunnersuummi oqariaatsit ”nunalerineq” aamma ”nunalerinermik inuussutissarsiuteqarneq” uumasuutininik ingerlatsinertut kinguaassiortitsinertullu, kiisalu orpinnik naatsitsinertut, naatitanik naatsitsinertut aamma ivikkanik naatsitsinertut paasisariaqarmata, tamatumalu saniatigut amernik meqqunillu atuinerneq ingerlatsiviit aamma nassuiaatigineqarlutik.

3. Siunnersuutit tusarniaassutigineqarnera

Siunnersuut manna tusarniaassutigineqarpoq ulloq 08. april 2009 akissuteqarnissamut killissarititaq ullormut 15. juli 2009-mut tigusassanngorlugu. Ukualu tusarniaanermut ilaatinneqarsimapput; Kalaallit Nunaanni Kommuneqarfiit Kattuffiat (KANUKOKA), Savaatillit Peqatigiit Suleqatigiissut (SPS), Konsulentitjenesten for Landbrug, Sulisitsisut Peqatigiiffiat (GA), Nunaqavissut Sulisitsisut Kattuffiat (NUSUKA) aamma Sulinermik Inuutissarsiuteqartut Kattuffiat (SIK). Tusarniaanermi piffissaaq killigititaasup qaangiunnerani oqaaseqaatinik Inuussutissarsiornermut aamma Suliffissaqartitsinermut Naalackersuisoqarfimmit (matuma kingorna ISN) aamma ataatsimoorussamik tusarniaanermut akissuteqaammik Nunaateqarnermut Siunnersuisoqatigiinnit aamma SPS-ip siulersuisuunit tigusisoqarpoq. Ataatsimiititaliaq isumaqarpoq tusarniaaneq pitsaasumik ingerlanneqarsimasooq, aamma tusarniaanermut akissutit

siunnersuummut nalinginnaasumik oqaaseqaatinut peqqisaartumik oqaaseqaasiorneqarsimasut. Taamaattumik naalakkersuisoqarfimmit tusarniaaneq maligassiutinertut isigisariaqarpoq.

4. Siunnersuutit ataatsimiititaliami suliarineqarnera

Nunalerinermi pissutsit maanna atuuttut naleqqussarnissaat aamma inuussutissarsiummi atuisunut pitsaanerumik atugassaqaartitsinissaq inatsisissatut siunnersuummi anguniarneqarpoq. Kalaallit Nunaanni nunalerineq ineriartupilooqaaq, tamannalu inuiaqatigiinnut inuussutissarsiummullummi annertoqisumik piumasaqarfiuvoq. Ineriartorneq ingerlasoq qularnaarniarlugu sinaakkusiussatut piumasaqaatit ataavartumik naleqqussarnissaat pitsaanerpaanissaallu pingaaruteqartuusut Ataatsimiititaliaq isumaqarpoq. Nunalerineq aallartissallugu ineriartorteqqissallugulu akikitsuinnaanngilaq, taamaattumillu aallarnisarnermut, annertusaanermut, narsaatinik nutaanik naggorissaanermut il.il. taarsigassarsinissamut naammattumik aningaasaliisoqartarnissaa pingaaruteqarpoq. Imminut pilersornerulersinnaaneq periarfissaavoq, taamaalillunilu nunami maani pinngortitami isumalluutit amerlaqisut nungusaataanngitsumik atuinikkut imminut annertunerumik napatitsisoqarsinnaalluni, naluneqanngitsutummi nunalerinermik inuussutissarsiuteqarneq annertoqisumik periarfissaqaartitsivoq. Taamatuttaaq nunalerineq suliffissaqaartitsinermut pitsaasumik sunniuteqaqataasinnaavoq, aaqqissuulluakkamimmi ingerlatsinikkut ukioq

kaajallallugu suliffiusinnaasunik amerlanerusunik pilersitsisoqarsinnaammat. Kujataani periarfissat avaqqunneqarsinnaanngillat, taamaattumillu inuussutissarsiutip siunissami periarfissaritai siuarsarniarlugit misilittagaalereersut atorluarnissaat pissusissamisoorportaaq. Inuussutissarsiutitsinnik ingerlatsinerup minnerunngitsumik aningaasarsiornermi ineriartornermut pilersitseqataasinnaasut pitsanngorsarnissaat nunatsinni tamatta soqutigisaraarput, taamaalilluta aningaasarsiorneq imminut napatinnerusoq aamma ilapittuutaassammat. Taamaattumik suli imminut pilersornerunissaq ineriartortinniarlugu nunalerinerup tungaatigut pitsaasumik ineriartortitsinissamik pilersitsinissamut kissaateqarpugut – minnerunngitsumik tunisassiat tunisassianik eqquusuinermut killiliisut siuarsaaviginissaat periarfissaatinniarlugu. Taamaattumik inatsisissatut siunnersuutit matuma periarfissiinneratigut nunalerinermut sinaakktissatut piumasaqaatinik pitsaasunik atugassaqaartitsinissaq Ataatsimiititaliap pisariaqartutut isigaa.

5. Ataatsimiititaliap inassutaa

Ataatsimiititaliap isumaqatigiittup siunnersuut **akuersissutigineqassasoq** inassutigivaa.

Taamatut oqaaseqarluni Aalisarnermut ataatsimiititaliap siunnersuut siuliani tungavilersuutit innersuussutigalugit aappassaaniigassanngortippaa.

Siulittaasoq/Siulittaasup tullia